

# 正法念處經卷第二十一

## 畜生品第五之四

爾時毘摩質多羅阿修羅王。聞第三地華鬘阿修羅王。勇健阿修羅王。羅睺阿修羅王。被破失力。時有阿修羅。語鉢呵娑言。軍眾破壞。無能救者。唯汝有力。能護彼軍。鉢呵娑言。汝速看彼三阿修羅王。今在何處。阿修羅言。今者悉為諸天所破。還歸水底。住於門下。皆失勢力。遙歸大王。娑羅呵娑。欲求救護。望助其力。羞慚愧恥。於門下住。不得入城。時毘摩質多羅鉢呵娑。聞是語已。語阿修羅言。阿修羅等。與天共戰。釋迦天主。在中不耶。阿修羅言。未曾來也。時鉢呵娑。聞是語已。即大瞋恚。眼赤如血。奮其身力。視阿修羅。作如是言。唯四天王。破壞三地。諸阿修羅。令失勢力。阿修羅軍。無所能為。為彼一天之所破壞。我今當往破一切天。時鉢呵娑阿修羅王。作是語已。諸阿修羅。皆的威力。阿修羅王。敕諸軍眾。速疾擊鼓。我欲自出擊彼天眾。令其破壞哀惱喪滅。及帝釋王。我獨能破。天今破壞阿修羅眾。我不能忍。若無我者。得言諸天有大勢力。我今猶存。云何諸天。能有大力欲望奪我阿修羅

女。毘摩質多羅鉢呵娑。說此語已。擊大戰鼓。告諸軍眾。速疾莊嚴。我今欲往攻彼天眾。令阿修羅眾皆得增長。如是救已。即自發起百千輪殿。無量千億阿修羅軍。光明如日。始發起時。一切大地山河。乾陀羅山。須彌山王。皆悉大動。乃至善見城。天善法堂。釋迦天主。所坐之處。動搖不定。時天帝釋。作是思惟。我座搖動。阿修羅王。必與天鬪。是故令我坐處傾動。時天帝釋。告諸天曰。若毘摩質多羅阿修羅起。則園林山谷須彌山王。皆悉大動。汝等三十三天。速疾莊嚴。阿修羅來。毘摩質多羅鉢呵娑阿修羅王。發起欲來破壞天眾。我今亦自乘伊羅婆那象。及諸天眾。共詣鬪處。何以故。我不見天眾能與此鉢呵娑毘摩質多羅阿修羅王共戰。時天帝釋。說是語已。善見城中。善法堂上。一切天眾。一天宮所住之處。皆悉敕令。出善見城。往趣毘摩質多羅鉢呵娑鬪戰之處。天眾聞已。即入質多羅林。取種種器仗。此質多羅林。一切戰具皆悉備有。時彼天眾。或百或千。或千億萬億。疾入彼林。皆取戰具。聲震躁擾。如海潮聲。逼迫隘疾。颶塵滿空。如是大眾。或有行空。有行山脊。有行山谷。周圍大陣。無空缺處。復有諸天。遊戲林間。聞擊鼓聲。走趣質多羅林。捨於欲樂。取眾戰具。百百千千億億萬眾。一切諸天。皆共瞻仰帝釋天王。時天帝釋。見是天眾。皆大歡喜。坐眾寶殿。其殿

嚴麗。七寶莊嚴。或以光寶而為嚴飾。或有金色以為莊嚴。或毘琉璃。或以頗梨。或以車乘。或以迦羅種種大寶。以為莊嚴。或種種摩尼。以為莊嚴。寶網羅絡。懸眾寶鈴。端嚴殊妙。如業果報。得此勝殿。其身光明。威德赫焰。位次相比。間不容人。或有住於須彌山峰。側滿充遍。有住空中。百百千千。皆共瞻視釋迦天王。伺待天主與阿修羅王共戰。各各籌量。設諸方便。時天帝釋。告御臣曰。賢士汝往告彼伊羅婆那六頭白象。具足一切大龍功德。我乘此象。摧阿修羅。是時御臣。受天主教。即向如意蓮華池所。時伊羅婆那六頭白象。與眾群象。遊戲池中。爾時侍臣。告象子曰。天主釋迦。欲乘寶象摧阿修羅。象子聞已。即告寶象。伊羅婆那。聞其所說。即共守者。詣御臣所。到善法堂。侍臣即入。白天帝釋。天王當知。第一寶象。今已來至。時天帝釋。即以憶念。化此寶象。令有百頭。面貌清淨。離諸塵垢。其一頭。皆有十牙。皆悉鮮白。一一牙端。有十華池。一一池中。有千蓮華。一一蓮華。有十華臺。一一華臺。有百華葉。一一葉中。有百玉女。以五音樂。歌舞嬉戲。出美妙音。無以為比。如是伊羅婆那。殊勝寶象。帝釋天王之所變化。其身廣大。一千由旬。其色鮮潔。純白無比。帝釋乘之。欲破阿修羅軍。種種伎樂。或有歌舞。或有戲笑。或嘯或吼。或有叫喚。光明威德。端嚴殊妙。

出善見城。諸天見已。各乘種種異色寶殿。種種器仗。以自莊嚴。種種伎樂。歌舞戲笑。暗噫(烏薤反)出聲。歡喜悅樂。見帝釋王喜悅倍前。時天帝釋。端坐寶象。王處其中。大功德力之所集成。無量天眾。周匝圍遶。端嚴無比。種種天眾。皆共圍遶。三十三天王。其明勝於百千日光。滿虛空中。眾伎樂音。充塞遍滿二萬由旬。從上而下。詣阿修羅鬪戰之處。爾時護世四大天王。發聲大叫。上昇虛空。往詣天帝釋。即於空中。遇天帝釋。白言。天王毘摩質多羅鉢呵娑。欲伐諸天。一切大海。擾亂不定。百千眾山。皆悉動搖。阿修羅眾。奮武遊戲。出大怖聲。大海魚鱉及小龍子。皆失身力。小羅剎鬼。毘舍遮鬼。無量眾生。喪失身命。婆羅摩悌。非法惡龍。歡喜踊躍。吼如雷震。婆修吉德叉迦等。法行龍王。愁悴自守。毘摩質多阿修羅王。從水下山。六萬真金須彌樓山。悉皆震動。一切眾生。心皆怯弱。鬻持天。常恚意天。迦留足天。三箜篌天。心皆惶怖。怯弱不安。遣我來至大天王所。天王當作何等方便。如是我已破彼三地阿修羅軍。羅睺阿修羅王。華鬘阿修羅王。勇健阿修羅王。百千共戰。悉已破壞。帝釋聞已。告護世言。我已先知。毘摩質多羅鉢呵娑。起欲惱天。我今欲下摧破阿修羅軍。救護諸天。我為法護。為法所救。修行於法。法為勝幢。求法樂法。不樂非法。我以如是功德。能破

彼軍。我則得勝。無勝我者莫生怖畏。我今將大軍眾。到阿修羅所。莫生怯弱。所以者何。閻浮提人。孝養父母。恭敬沙門婆羅門耆舊長宿。知恩報恩順法修行。守護正法。喜樂正法。信奉正法。供養沙門。知業果報。於六齋日。齋戒自守。布施持戒。修福習智。我常憶念。順法修行。受行法戒。彼阿修羅。無有法行。是故於彼阿修羅所。無少畏心。時天帝釋。說是語已。往詣毘琉璃山頂。四天王天所住之處。時天帝釋。見四天王。告諸天眾。此護世四天。來集此處。欲破阿修羅軍。時護世天。白帝釋言。此諸天眾。天王所攝。天王所護。依止天王。不畏阿修羅及其軍眾。如是說已。時三十三天。皆大歡喜。讚天王言。天王常勝。天眾常勝。既讚嘆已。到四天王所。時天帝釋所將天眾。無量百千宮殿圍遶。乘伊羅婆那大白象王。如上所說。其身殊妙。七寶光焰。赫若電光。滿虛空中。無量音樂震吼之聲。充滿十方。百千天眾。歡喜圍遶。住須彌山。乾闥婆眾。莊嚴諸天。仙聖歌頌。無比讚歎。共相娛樂。自善業果。受第一樂。時四天等。見帝釋下。皆大歡喜。時天帝釋。告四天王。我今至此。欲破阿修羅。勿怖勿怖。諸天大眾。悉集來此。時四天眾。聞已歡喜。白言。天王。我已獨能破阿修羅。況天王來。大眾皆集。我依天王。於阿修羅。無少畏心。說是語已。即遶帝釋。於一面住。觀毘摩質多

羅阿修羅王。羅睺阿修羅王。勇健阿修羅王。華鬘阿修羅王軍。身著諸天金剛鎧鉀。手執種種兵刃武器。欲摧阿修羅軍。心念不息。住種種寶莊嚴殿上。法行龍王。婆修吉德叉迦等。心欲鬪戰。住在一面。瞻仰帝釋。隨其教敕。即當奉行。共觀水下。時四阿修羅王。忽然直出。一切軍眾。無量千億。皆共圍遶。手執種種鬪戰之具。直前而進。不顧左右。無量百千億大眾圍遶。一切須彌留山。皆悉震動。一切阿修羅中。其力最勝。善解無量鬪戰之術。從水下出。猶如第二須彌山王。與鉢摩梯等非法惡龍。而自圍遶。毘摩質多羅鉢呵娑。來至戰場。諸天大眾。遍虛空中。阿修羅軍。滿大海上。欲共天眾興大戰鬪。各自思惟。欲觀鬪戰。於一面住。時四天王。德叉迦婆修吉等。白帝釋言。天王。阿修羅軍。在我前住。天王何故。不救我等與彼共戰。時天帝釋。告諸天眾。及諸龍眾。我今當遣護世四天。下閻浮提。觀諸眾生。孝養父母。恭敬沙門婆羅門。順法修行。則能破壞阿修羅軍。天為法護。依止於法。依法增長。天亦增長。法損滅故。天眾亦滅。我今遣汝詣閻浮提。到人世界。如是說已。即敕四天。汝速往閻浮提。觀諸眾生。若有順法。孝養父母。恭敬長宿。供養沙門。齋戒自守。布施持戒。不行放逸。隨順正法。時四護世。聞是語已。如射箭頃。至閻浮提一一住處。一一村落。一

一城邑。一一軍營。一一交道。一一國土。一切觀察。孝養父母。供養沙門婆羅門耆舊長宿。皆遍觀察。見閻浮提人順法修行。孝養父母。供養沙門婆羅門耆舊長宿。如法修行。見是事已。心生歡喜。如射箭頃。到帝釋所。心喜踊悅。白天王言。甚可慶悅。釋迦天王。閻浮提人。順法修行。孝養父母。恭敬沙門婆羅門耆舊長宿。布施修德。增長天眾。減損阿修羅軍。帝釋聞已。甚大歡喜。告護世言。一切天眾。應生歡喜。我今破壞阿修羅軍。我今破壞阿修羅軍。閻浮提人。多修福故。天眾聞已。皆大歡喜。身力轉增。過先十倍。白言天王。何故而住。何故而住。我以天王威勢力故。破彼怨敵。令天得勝。時天帝釋。告婆修吉德叉迦等諸龍王曰。汝速走趣鉢摩梯等非法龍所。莫往毘摩質多羅阿修羅軍。時婆修吉德叉迦。聞是語已。即疾往趣阿修羅伴鉢摩梯等非法龍所。兩大猛火。時毘摩質多羅鉢呵娑。即遣鉢摩梯。放大熾電。一切惡龍。身上火然。受大苦惱。尋復破壞。走趣阿修羅軍。作如是言。各各異軍。不可勝彼大眾。皆當和合共鬪。天乃可破。作是語已。即復走向婆修吉德叉迦所。時法行龍婆修吉。見彼惡龍。語德叉迦言。彼以惡心瞋恚而來。我當為之而作衰惱。令不復來。若不加彼。數數如是惱亂我等。作是語已。時德叉迦即走往趣鉢摩梯所。於虛空中。兩大猛火。放諸煙焰燒彼惡龍。既被

燒已。尋便退走。奔趣阿修羅所。望救生命。羅睺阿修羅王。見是事已。作如是言。此龍破壞。退來至此。汝等何故捨之而住。作是語已。奮力而走。時迦留足天。見羅睺阿修羅來。亦走往趣。交軍合戰。甚可怖畏。如惡險岸。諸小阿修羅。住於海中。皆悉壘塞。或有恐怖喪其生命。空中雨刀。逼迓馱下。百千萬數。如是鬪時。若天被害。斬截手足。尋復還生。無所患害。一切身分。亦復如是。無所患苦。色相不異。妙色具足。唯除斬首及斷半身。天阿修羅互相怨敵。如是鬪戰。若阿修羅。為天所害斷則不生。亦如人法。受諸苦痛。非如天法。時迦留足天。與羅睺阿修羅軍。如是大戰。時迦留足天。復取無量大山。兩阿修羅軍。時阿修羅軍分散破壞。為百千分。羅睺阿修羅王。見其軍眾悉破壞已。即取大山。廣三百由旬。走向天眾。時迦留足天見已。手執弓仗。亦走往趣。以箭射山。碎如沙末。墮大海中。虛空雨刀。時阿修羅。見是事已。畜生心故。少勇怯弱。走向勇健阿修羅軍。勇健阿修羅王。見其退還。告軍眾言。此羅睺王。空有大身。無有少力。為天所壞。走來奔軍。欲望救護。如凡阿修羅。等無有異。以無力故。若有力者。則以此身。必能獨破一切天眾。是身如第二須彌山王。此迦留足天。第一勇健。能與如是大身共鬪。而不破壞。作是語已。即與陀摩睺眾。走趣迦留足天。欲共鬪戰。

時天見已。即告鬘持天言。速來速來。今勇健阿修羅王。將大軍眾。來向我所。時鬘持天。聞是語已。即復疾走向勇健羅睺阿修羅所。羅睺復與勇健阿修羅。牢自莊嚴。迴向天眾。欲與迦留足天相撲共鬪。念本宿怨。擲大石。上雨刀箭。種種器仗。及擲大樹。滿虛空中。間無空處。不復相見。百千共鬪。無等鬪戰。諸天身分。壞已復生。亦如上說。阿修羅軍。被斬不生。亦如人法。諸天軍眾。唯除斬首。命則不全。若斷中腰。亦復如是。是時天眾。少有減損。阿修羅眾。多有喪滅。時阿修羅。被天破已。餘殘軍眾。還退水下。欲望救護。天眾大叫。阿修羅軍。聞其叫聲。皆失威力。微命自存。羅睺勇健。走還本城。於門下住。時第三地華鬘阿修羅王。見羅睺勇健為天所破。告軍眾曰。我軍悉來。當與天戰。我有大力。天何所能。作是語已。即與其軍走趣天眾。及羅睺勇健阿修羅軍餘殘相率。還與華鬘俱詣天眾。共相謂言。何故妄稱阿修羅王。而自退走。既自無力。又無刀戟。善巧戰敵。設得至宮。毀辱妻子。說是語已。氣力還增。身如大山。手執兵器。走速如風。復向天眾。欲與天戰。時天使者。及鬘持天。常恚意天。迦留足天等。皆共籌量。一切阿修羅。皆共和集。欲來我所。自恃己力。而生憍慢。不知天力。說是語已。走趣阿修羅。即共大鬪。上雨大山。或雨大石。雨刀雨戟。共相擒撲。

無量相殺。無量逼迫。無量相打。無量喪命。遍大海上。無量種鬪。無法可喻。龍眾共龍。無量種鬪。時天帝釋。見是事已。告三十三天言。速疾莊嚴。一切阿修羅眾。今皆來此。除鉢呵娑。我當乘伊羅婆那白象。與鉢呵娑鬪。時天帝釋。告諸天已。語伊羅婆那白象王言。我今乘汝。破毘摩質多羅阿修羅王及其軍眾。作是語已。手執金剛。遍觀阿脩羅眾勢力誰勝。見天得勝。阿修羅軍。退沒不如。天見阿修羅破壞退走。皆大歡喜。天王帝釋。怡悅喜樂。時鉢呵娑。見是事已。作是思惟。三地無量億阿修羅眾。鬪戰失利。皆已破壞如前。於一切觀池所見無異。如實不虛。我今當往破天帝釋。壞彼諸天。說是語頃。天眾已至水底門下。時毘摩質多鉢呵娑。生大瞋恚。諸山搖動。大海涌波。日光山頂。皆作赤色。及其軍眾。住於水底。見諸天眾破羅睺等阿修羅軍。走趣水下。無力無救。一切擾亂。天大唱叫。一切阿修羅。皆悉失利。互相謂言。我今無力。無有救護。有阿修羅言。勿怖勿怖。還迴勿走。說是語時。即雨山峰。遍打阿修羅軍。天大歡喜。唱如是言。捉阿修羅。捉阿修羅。殺此非法惡行畜生。常惱我等。不能鬪戰。怯如烏鳥。無勇健志。不善刀戟。如是好破。令不復迴。此阿修羅鬪。不知時節。如是天眾。各各歡喜。向阿修羅。欲加打害。瞋恚目赤。猶如絳色。雨刀雨戟。又雨大火。猶

如秋月降注大雨。如是破壞阿修羅眾。時鉢呵娑阿修羅王。坐百千輪行殿之上。與無量億阿修羅眾。而自圍遶。雨種種刀戟。手接大山。或一由旬。乃至五由旬。向於天眾。時羅睺阿修羅等。見是事已。氣力還生。復迴欲鬪。時鉢呵娑安慰之言。勿怖勿怖。我今來此。破一切天。喪滅摧壞。汝莫怖畏。阿修羅王。勿怖勿怖。若至本宮。於己妻所。云何自稱。我是丈夫。而無膽勇。虛稱丈夫。時鉢呵娑。說是語已。走趣天眾。諸天見之。亦疾往趣。天與阿修羅。合陣大戰。大聲震吼。滿須彌留山川谿峪。時羅睺阿修羅王。走趣迦留留足天。勇健阿修羅王。手執大戟。走趣鬘持天。華鬘阿修羅王。手擎大山。廣三由旬。走趣三筵天。及天使者。如是大戰。一切眾生。聞說毛豎。何況睹見。時鉢呵娑阿修羅王。復欲調伏摧壞諸天。如風吹雲自恃大力。不懼天眾。時四大天王。如是被惱。至三十三天。白帝釋言。天眾獨鬪。將為阿修羅之所破壞。天王速去。莫令天眾散滅毀壞畜生得勝。天王速去速去。除善法堂。餘一切天。皆當速去。三十三天。聞是語已。一切天眾。皆悉疾往鉢呵娑毘摩質多所。雨眾刀箭。鉢呵娑於三十三天眾上。兩大石山。滿虛空中。一切和合。吼叫大鬪。各自謂。我軍得勝。如是鬪戰。百千山谷。互相打觸。碎為微塵。於虛空中滿千由旬。此塵雲中。迭互雨箭雨山。猶如秋雨。無量

億阿修羅眾。喪滅不還。諸天眾中。無量千人天命喪壽。怯弱阿修羅等。為護命故。走入本宮。敗軍之餘。既入城已。阿修羅眾諸婦女等。來問之言。我夫今者。為何所在。阿修羅答言。阿修羅軍。與天共鬪。破壞天眾。皆大歡喜欲來不久。時阿修羅諸婦女等。即向一切觀池觀阿修羅軍。見天得勝。阿修羅軍敗散破壞。死屍狼藉。百退千退。諸女見已。悲塞懊惱。卻坐於地。啼泣悲哀。心大苦惱。遶地而住。椎胸大叫。自拔頭髮。舉手拍身。眼中流淚。時諸婦女。於池水中。見夫死已。憂悲大苦。天阿修羅。如是共鬪。如是大惡。鉢呵娑阿修羅王。與無量億阿修羅。而自圍遶。來向帝釋。帝釋見已。告諸天眾。此阿修羅。今來我所。欲共鬪戰。難可調伏。我以法伴。當破彼軍。如明除暗。說是語已。乘伊羅婆那白象王。其走速疾。猶如射箭。善法天眾。而自圍遶。從上而下。直向阿修羅軍。拔大樹林。擲其軍上。又擲大石。或雨大箭。向鉢呵娑。時鉢呵娑。乘大輪殿。攻帝釋王。時天帝釋。語鉢呵娑。汝為畜生。住非法道。欲何所至。吾當壞汝。令汝退還。走入水下。時毘摩質多羅鉢呵娑。語天主言。我今破汝及諸天眾。時毘摩質多羅鉢呵娑。接大金山。廣五百由旬。以擲天眾。伊羅婆那白象王。見金山來。口出猛風。吹破金山。猶如沙末。墮大海中。時阿修羅王。見金山碎。復取金剛齊山。

廣五百由旬。擲天帝釋。時伊羅婆那白象王。以鼻接取。還打鉢呵娑阿修羅胸。令其傾動。三十三天。見是事已。揚聲大叫唱言。畜生。天王破汝。白象打汝。令汝傾動。何況帝釋。手放金剛。作是語已。一切天眾。走向阿修羅軍。有取大右。有取大樹。有取大山。有執大戟。有執大槩。有震雷電霹靂起火。有執犁具。或有相撲。有執刀輪。或有執刀。有行虛空。有執弓箭。有執圍山。有相擒捉(拈加反)有順法鬪。有相道理。或有指授。有多巧偽。有以火鬪。或有水鬪。或有注流。或一切鬪。或有鬪鬪。或有幻鬪。或以鋸鬪。或用抓鬪。或以殿輪。或以聲叫。聞者不忍。或以腳踏。或以手鬪。如是種種器仗。身皆具足。一切天眾。在帝釋前。向阿修羅。時鉢呵娑羅睺王等。見諸天眾執種種器仗。共鉢呵娑向帝釋所。時諸天眾。見四阿修羅王向帝釋所。即自莊嚴。以助天王。時天帝釋。自觀天眾。告阿修羅曰。汝等畜生。云何如是癡無所知。一切阿修羅力。不及一天之力。獨我一天。能破汝軍。何以故。天有法力。汝無法力。法以非法。相去玄絕。譬如日光。比於闇冥。如以實語。比於妄談。如以須彌山。比於眾山。如以解脫比於繫縛。如以利益。比於衰損。如以善友比於冤家。如以甘露比於毒藥。如以白日比於昏夜。如以偽珠比於真寶。如以巨富比於貧窮。猶如行使比安住者。如以螢火比於日光。

如無足者欲比猛風。相去玄遠。如以盲人比明眼者。如以險路比平坦道。如以外道比於如來。猶如虛空比於土地。如以一念欲比一劫。汝之與我。相去玄殊。亦復如是。

汝不順法。我則敬重。汝便愚癡。我有智慧。汝不修福。天修福行。汝是畜生。我為淨天。如是知己。汝則不應與吾共戰。說是語已。即現去相。令伊羅婆那向阿修羅。伽他頌曰

法能破非法 實語破虛妄  
智慧破愚癡 天破阿修羅

爾時帝釋。說是語已。化伊羅婆那。如前所說。向阿修羅軍。速過疾風。手執千刃金剛。怖阿修羅。不以殺心。時阿修羅。見天帝釋。亦走往趣。時四天王。三十三天。亦各疾走。天與阿修羅。交陣大戰。皆望得勝。互相攻伐。天阿修羅。有被傷害。歿命而死。或有怯弱。退走還歸。有住觀視。有心念歸。或有瞋恚。或復癡亂。或有怖畏。時天帝釋。即作變化。令阿修羅見伊羅婆那白象王。一一頭上。有千帝釋。皆以手執千刃金剛。種種器仗。眾蓮華池。亦如前說。於華池中。見無量千帝釋天王。伊羅婆那。化為十頭。一一頭上。有千浴池。一一池中。有千蓮華。一一蓮華。有百華臺。一一華臺。各有千葉。象頭華臺。有百千億帝釋天王。億那由他種

種武器。金剛寶劍。間無空處。時阿修羅。見是化已。怖畏迷沒。作是念言。帝釋天王。遍虛空中。間無空處。手執種種刀戟器仗。身力無量。種種刀杖。滿虛空中。間無空處。遍於十方。恐其水下。天帝軍眾。亦滿其中。時阿修羅。甚大怖畏。各共相告鉢呵娑言。阿修羅。勿怖勿怖。我能伏彼帝釋天王。伊羅婆那。說是語已。疾走往趣伊羅婆那大龍象王。時伊羅婆那。即時以鼻。捉阿修羅。於虛空中迴旋轉之。如人弄鈴。垂死乃放。象既放已。得少喘息。語阿修羅言。一人云何能破帝釋。今當一切盡共攻之。時四阿修羅王。復走向伊羅婆那。帝釋見已。放金剛雹。打阿修羅。欲令退散。非為奪命。時阿修羅。以無量大山刀劍矛槊雨天王上。如夏降雨。注天王身。端嚴無患。如是天王。與阿修羅無量大鬪。餘天見已。走趣阿修羅軍。阿修羅軍馳趣天眾。互共鬪戰。無量惱害。無量眾生見者大怖。無等媯亂。如是大戰。天阿修羅王。及其軍眾。互相攻伐。無量器仗。堅如金剛。共合鬪戰。時天帝釋。雖見無量阿修羅眾在其前住。而不奪命。但欲破彼阿修羅眾。令退無餘。時鉢呵娑毘摩質多羅阿修羅王。及其軍眾。退散敗走。以來救護。求歸依處。歸大海下。向門而走。喪失勢力。毘摩質多羅鉢呵娑。乘百千輪殿。以為卻敵。令三阿修羅王在前而走。怖畏苦惱。時天帝釋。告伊羅婆那白象王

言。速疾逐彼毘摩質多羅。彼以慢心。自言大力。汝今速往破其所乘百千輪殿。大仙所說不殺生戒。是涅槃道。此言真實。眾生愛命。勿斷其命。汝速至彼。破其輪殿。為百千分。伊羅婆那。聞是救已。以變化身。疾於迅風。至大海下。鉢呵娑毘摩質多羅。見已怖畏。在大海底。向門疾走。無力能進。伊羅婆那。以大勢力。到其所已。手執其輪。令鉢呵娑墜墮殿下。接令離殿。現對其所。碎其大殿。如摧朽草。時花鬘阿修羅王。皆失勢力。命垂欲絕。憶念妻子。走趣門下。勇健阿修羅王。亦復逃奔。走趣水下。向門而走。以求自救。羅睺阿修羅王。亦復逃遁。走趣水下。望自救命。雖有全身。悉無氣力。是時天眾。見阿修羅悉破壞已。歡喜而言。阿修羅等。鬪戰得報。破壞退走。天見是事。作如是言。我等當往至其門下。觀彼破阿修羅。時天疾往。走向水下。阿修羅被破。猶如猛風吹破浮雲。天帝見已。語阿修羅言。汝以何故。自為此惡。令無量阿修羅眾喪失軀命。汝與諸天共為怨敵。無少利益。今閻浮提人。順法修行。以人修善。天有勝力。人行不善。天則破壞。汝不知時。不知方處。與我怨敵。無所利益。汝欲伐天。自得衰害。時阿修羅。聞是語已。復入水下。以求生命。時天帝釋。救諸天眾。可迴可迴。阿修羅軍。皆失氣力。唯有微命。放之令去。還本所止。時諸天眾。白天王言。此阿修羅。



不可調伏。不知自力。不審他力。我等今可復更破壞阿修羅眾。令不復迴我於天中。自業受樂。於阿修羅。不生惱害。此阿修羅。云何於他順法行人。而欲衰惱。我不報怨。終不迴也。說是語已。手執種種器仗刀戟。速疾走趣阿修羅軍。加以怖畏。令其破壞。而不殺害。時天帝釋。起悲愍心。於鉢呵娑恐其怖死。告諸天眾。汝等無慈悲心。說是語已。與善法堂一切天眾。還向天宮。時四大天王。見帝釋還。告三十三天眾言。天王既還。汝亦可迴。既得勝力。皆各歡喜。乘還本宮。天王帝釋。乘伊羅婆那白象王三十三天。歌頌讚嘆。詣第二天。昇善法殿。及餘天眾。皆入本宮。悉捨鉀胄。置雜殿林。伊羅婆那。捨於化身。還復本形。入蓮華池。如是到天世界。受五欲樂。五欲功德。共相娛樂。遊戲林地。婆修吉龍王。德叉迦龍王等。破阿修羅既得勝已。心懷歡喜。還戲樂城。阿修羅軍被破餘殘。身體毀壞。羞愧低頭。諸婦女等。憂惱愁悴。向阿修羅。羅睺阿修羅。語諸被破阿修羅言。我先不語汝等。非是與天共戰鬪時。人順正法。孝養父母。恭敬沙門婆羅門耆舊長宿。增長天眾。減損阿修羅。我說是語。不隨我言。是故今日。得此惡果。今天殺害無量眾。有阿修羅。語羅睺言。實如所言。不用王言。非時而鬪。是故今得如是惡果。陀摩睺阿修羅言。以業欲熟。令我不迴。生如是意。得

此惡果。如是迭互說已。還於自地。毘摩質多羅。到第四地。入其本城。甚大羞恥。憂悴低頭。娑女圍遶。憂憤憔悴。鉢摩梯等。非法惡龍。喪失氣力。還戲樂城。如是愛毒。破壞眾。互相加害。流轉世間。無有少樂。賢聖弟子。如是觀已。得離欲意。

復次修行者。內觀於法。隨順修行。此比丘如是觀已。得十七地。心常樂觀。第一實諦。爾時地神夜叉。見已歡喜。告虛空神。虛空夜叉聞已歡喜。告護世天。如是展轉。乃至少淨天。皆說是言。閻浮提中。有善男子。住某聚落。名字某甲。以信出家。剃除鬚髮。被服袈裟。離魔境界。不樂煩惱。厭捨生死。作是觀已。今得如是。第十七地。諸天聞已。皆大歡喜。作如是言。如此比丘。天中之天。損滅魔眾。增益諸天。

正法念處經卷第二十一畜生品竟